

清 代
三 朝 史 案



清代三朝史案

中

江蘇廣陵古籍刻印社

齊召南跋齊周華天台山遊記案

蘇昌熊學鵬奏齊周華著書悖逆及審擬摺
繳回硃批檔

閩浙總督臣蘇昌跪奏爲審明黨逆重犯請旨正法以正人心事竊臣熊學

浙江巡撫臣熊學鵬

鵬於乾隆三十二年十月二十四日至天台縣盤查倉庫有該縣民人齊周華在道旁將所刻名山藏初集古文二本諸公贈言一本半山學步時文一本懇求作序又爲呂留良事該犯獨抒己見奏稿一本又呈狀一紙內告伊妻犯姦及堂弟齊軒南主謀令伊子媳毒害毆打等情又摘發隱奸封事一本內告齊軒南包訟陷人及伊堂弟齊召南爲人詐僞並將其通族外姻隣佑多人一併牽告等情臣熊學鵬當即取閱各書語多悖逆謬妄其人乃係惡類其所著作必不止此呈出數種隨率同糧儲道陳夢說寧紹台道方桂及該地方官親詣該犯家內搜查該犯妻子親屬俱在天台縣城內居住該犯住居之處僻在天台縣城西二十餘里所住樓屋三間四無隣佑臣熊學鵬至該處與陳夢說方桂等又檢查出伊所著書十二種內名山藏二集一本華陽子詩稿一本太平話一本初學集一本需郊錄一本老嫗解一本天台山誌補遺一本樂行草

一本又慙稿一本黔行賦一本補增志稿一本課讀日知一本當即在天台縣訊據該犯供稱伊曾於呂留良案內赴部具呈遞解回浙令學政查明具奏審過多次革去秀才禁錮在縣雍正十一年有台州監造桐栢宮之侍郎留保查訪此案密奏奉旨著總督查審後來定案說小的挾仇誣告永遠監在杭州府獄雍正十三年荷蒙恩赦等語臣熊學鵬查卷案及所供刻字人等俱在省城隨飭委寧紹台道方桂督同該地方官將該犯所呈各書及搜出所著各書並該犯及應訊親屬等押解來省臣熊學鵬查該犯乃係原任禮部侍郎齊召南堂兄齊召南現在天台城內因傳齊召南至臣熊學鵬寓所面訊據稱齊周華係我堂兄從前曾見過他天台遊記一篇時文數篇他要刊刻我因他文理不通阻他不刻他便恨我至他平日爲人乖張狂誕罔顧倫紀隨手假言無風生影是以久不與之往來至他告我的話俱係憑空捏造等語臣熊學鵬於十一月初二日至杭州寧紹台道方桂督同該地方官於初三日亦帶齊案犯書籍來省臣熊學鵬隨將該犯所呈各書及該犯家內搜出之書督同布政使永德按察使歐陽永禧糧儲道陳夢說鹽驛道徐綿逐細檢閱提犯嚴加研究惟該

犯所供原任侍郎留保密奏一案臣巡撫衙門及兩司衙門細細檢查並無此案存貯其伊從前犯事由部遞解回浙及問擬充軍具題並奏請永遠監禁釋放之案悉行查出臣熊學鵬正在審擬間臣蘇昌適至杭州亦會同鞠訊查得齊周華原係天台縣生員雍正九年間值呂留良逆案事發欽奉世宗憲皇帝諭旨詢問各省生監如以呂留良應行正法卽行出結內有獨抒己見者令其呈明學政不得阻撓隱匿其時齊周華已經出結旋又稱伊有獨抒己見被訓導王元洲阻抑遂赴刑部具呈准部遞解回浙先經前撫臣程元章學政臣帥念祖審係挾嫌妄告問擬充軍具題復經前督臣郝玉麟會同撫臣程元章具奏奉旨該部併案核擬具奏欽此經刑部議覆請將齊周華提至省城嚴加鎖錮永遠監禁奉旨依議欽此雍正十三年恭逢皇上御極蒙恩赦放該犯隨於乾隆六年出門歷遊各省至二十一年其長子齊式昕前往湖廣武當山接回該犯自歸家之後將所擬獨抒己見疏稿及生平著作他人贈言於乾隆二十六年寄倩杭州刻字匠周景文陸續刊刻自負才高自批自贊因欲變產刻集被其妻子屢次勸阻該犯遂因此嫉視如仇逐妻屏子獨自在鄉居住其親族

人等因其平日爲人不端共相棄絕乾隆二十五年間爲族長齊長庚以該犯回家後忽而逐妻忽而呈子忽而告戚種種橫行訓飭不遵曾擯出族呈縣有案該犯遂誣告伊七旬之妻老而奇淫通姦引盜幾於人盡皆夫并誣其長子齊式昕次子齊式文毒害毆打將伊一切親族盡行羅告經臣等提訊之下反覆究詰其所控呈詞封事情節俱係憑空誣捏毫無影響之言卽該犯亦自認妻子阻其賣田刻書親族庇護妻子因此控告至詰其因何欲釋逆犯呂留良子孫並所刻疏稿書籍曾否傳播又二集何故止有上卷並無下卷之處據稱奉旨獨抒己見所以從前妄思拯救疏稿書籍實在並未傳播至二集上卷原係陸續刊刻卷內尙有抄寫之頁實未成書是以並無下卷至將其各書內語句狂妄悖謬之處詰問伊亦自認罪無可辭臣等伏查呂留良罪大惡極爲天下臣民所共憤乃齊周華代爲逆犯請釋子孫蒙世宗憲皇帝如天之仁不卽誅戮僅令監禁又蒙皇上格外加恩釋放該犯自當感激激悔悟痛自湔滌前非乃怙罪不悛復將疏稿及其餘雜作刊刻妄冀流傳其獄中祭呂留良文一篇將逆賊呂留良極力推崇比之夷齊孟子希圖煽惑人心是其存心黨逆牢不

可破且自稱爲獨孤損跛仙忍辱居士含元子尙古先生華陽山人岳六子懔
懂道士種種詭異名字又私擬奏疏刊刻閱其已刻未刻諸書牢騷狂悖之言
不一而足廟諱御名公然不避臣等檢閱之下殊覺髮指查律載凡犯大逆但
同謀者不問首從皆凌遲處死正犯之祖父父子孫兄弟及伯叔兄弟之子男
不限籍之同異年十六以上皆斬其十五以下及正犯之母女妻妾姊妹子之
妻妾給付功臣之家爲奴正犯財產入官等語齊周華一犯應請照大逆律凌
遲處死其兄弟妻子雖經該犯視同仇敵久已屏逐但係律應緣坐之人亦不
便因此寬貸其罪所有該犯長子齊式昕次子齊式文長孫齊傳繞次孫齊傳
榮胞弟齊周蔭胞侄齊式鵬齊式鸞齊式標齊式冕齊式燕均照律擬斬立決
妻朱氏妾丁氏長媳奚氏次媳吳氏幼孫齊傳絢均給付功臣之家爲奴再查
齊式文先經在逃應通飭嚴緝務獲正法毋使漏網所有該犯家產查明入官
其刻字匠周景文雖據供不通文理不知悖逆情事究屬違犯請照違制律杖
一百折責四十板再加枷號一個月示儆餘審無干省釋至該犯書載諸人據
該犯供諸公贈言內房演楊繩武鄭義門蔣拭之鄭如夔盛禾張若震陸大業

各序跋俱係本人所作呂撫楊匯陳溥葉紹詩梅元標謝濟世陳升階侯嘉縉
丁學希僧紀安趙元容陳咫尺李紱文獻各序俱係伊借名以上諸人皆已亡
故至齊召南所作記跋曾經該犯添改沈德潛桑調元所作序文亦係借名惟
此三人現存臣等當又傳齊召南至省訊問據供雍正二年曾見過齊周華天
台山遊記爲跋數語今所刻者係齊周華自行添改並非原作又傳名山藏集
內作序之原任工部主事桑調元訊問據供與齊周華素非認識何從與之作
序適在家食俸之禮部尙書沈德潛來杭與臣熊學鵬面言德潛與齊周華並
未識面齊周華曾到蘇州求作時藝序文德潛托病辭却今所刻者係周華捏
名還詰齊周華亦供代作借名是實臣等伏思該犯各書內所有人贈伊之書
及伊送人之文名姓甚多有臣等知其實係已故者亦有臣等不知其實在存
歿者細細檢閱謹就臣等看出悖逆狂妄語句內有應訊之人移咨各該督撫
查其人尙存者分別訊取本人確供由各該督撫另行辦理至齊召南雖於該
犯犯事之後不與往來卽所跋台岳遊記亦經該犯刪改并非原本但齊周華
係齊召南堂兄召南身爲大臣旣知該犯素行狂妄不行稽查勸阻任其刊刻

悖謬書籍相應據實參奏恭候諭旨遵行再疏稿書籍雖據該犯堅供並未傳播與人但刻已六七年之久保無流傳應出示遍行曉諭限三個月內首繳免罪如逾限不繳查出從重究擬各書板片概行銷燬所有審明黨逆重犯請旨正法緣由臣等謹另繕供單合詞恭摺具奏併將該犯呈出之書及其家內搜出各書臣等看出悖逆謬妄之處粘貼黃簽同伊所遞呈狀封事各件一並進呈御覽伏祈皇上睿鑒勅下法司核覆施行謹奏乾隆三十二年十一月十八日硃批三法司核擬速奏

齊召南來京候旨諭 軍機處檔

據熊學鵬奏天台縣逆犯齊周華黨惡狂悖按律定擬並稱該犯係原任侍郎齊召南堂兄一併參奏請旨等語齊召南身爲侍郎近族有此逆犯從前何以並不據實奏聞齊召南著來京候旨欽此乾隆三十二年十二月初四日

寬免齊式昕等治罪旨 軍機處檔

旨齊周華著即凌遲處死伊子齊式昕齊式文伊孫齊傳繞齊傳榮俱著從寬改爲應斬監候秋後處決至該犯胞弟齊周蔭胞姪齊式鵬齊式鸞齊式標齊式冕齊式燕俱著加恩免其治罪餘依議欽此乾隆三十二年十二月初七日

明德奏楊繩武家中並無不法書籍摺

繳回硃批檔

江蘇巡撫臣明德謹奏爲奏聞事竊臣於乾隆三十二年十二月十二日准浙江撫臣熊學鵬咨稱天台縣犯人齊周華刊刻請釋呂留良子孫疏稿及悖謬書籍一案業經審擬具奏聲明該犯齊周華各書內所有人贈伊之書及伊送人之文名姓甚多有知其已故者亦有不知實在存歿者謹就悖逆狂妄語句內有應訊之人移咨各督撫查其人尙存者分別訊取本人確供由各該督撫另行辦理今據司道會詳將應行移咨各省查訊各人開冊具詳查冊開楊繩武字臯里於李紱所作序內楊臯里有言其仗義出險梗概等語查係江蘇吳縣人移咨查照辦理等因移咨到臣臣查楊繩武係蘇州府吳縣人康熙癸巳科進士翰林院編修於康熙六十一年丁憂回籍因患病未經赴補至乾隆十

五年六月內病故咨部有案楊繩武有二子長名楊慶孫係歲貢次名楊少孫係監生臣隨差拘其子並飭委蘇州府知府申夢璽率同該縣前赴楊繩武家嚴行搜查有無不法書籍去後旋據獲到楊繩武之子臣即率同兩司嚴加究訊據楊慶孫楊少孫同供貢生們是楊繩武的親子父親與李紱相與貢生們是知道的乾隆六年李紱做江南主考場後父親還到江寧去見過他一次至於李紱所作序內父親如何言其仗義出險梗慨貢生們從沒聽見父親說過實不知情那齊周華貢生們不知其人父親曾於雍正年間在浙江敷文書院做過院長父親與他有無相與貢生們在家實不知道等語再三究詰矢口不移並據蘇州府知府申夢璽等覆稱遵即前赴楊繩武之子楊慶孫等家查得伊弟兄已經分居楊慶孫住房六間楊少孫住房一間遍行搜查只有尋常經書文稿並無不法書籍等情除咨覆浙江撫臣外臣謹摺奏聞伏乞皇上睿鑒謹奏乾隆三十二年十二月二十一日硃批如此不必株連矣

熊學鵬奏齊召南已由仁和縣起程摺 繳回硃批檔

暫署閩浙總督事浙江巡撫臣熊學鵬跪奏爲奏聞事准吏部咨開乾隆三十二年十二月初四日奉上諭據熊學鵬奏天台縣逆犯齊周華黨惡狂悖云云見本案四頁欽此臣查齊召南於逆犯齊周華案內至杭州省城訊取供詞之後留省未回茲臣接奉諭旨當即傳令遵照起程今據署仁和縣知縣王莊等呈稱齊召南已於十二月十九日起程訖理合恭摺奏聞謹奏乾隆三十二年十二月二十四日硃批覽

宋邦綏奏謝濟世著有梅莊雜著摺

繳回硃批檔

廣西巡撫臣宋邦綏跪奏爲奏聞事乾隆三十三年正月初五日准浙江撫臣熊學鵬咨稱天台縣犯人齊周華刊刻請釋呂留良子孫疏稿及悖謬書籍一案云云

見本案四頁另行辦理

今查應訊各人內有謝濟世係廣西人其於齊周華獄中添

髻記內叙陳學海贈伊詩內有可憐補袞一無人之語相應移咨查辦等因到臣臣查謝濟世係廣西全州人前任湖南驛鹽道休致回籍乾隆二十年二月經前撫臣衛哲治以伊縱子指官撞騙題叅革審嗣因謝濟世即於是年四月

內患病身故奏結在案茲准浙江撫臣咨查謝濟世所贈齊周華添髻記叙內悖逆語句來由雖謝濟世久已身故而贈叙原稿自必尙存家內當即委按察使圖桑阿帶同署桂林府劉宗瑛前赴謝濟世家內查辦並訊取伊子確供去後茲據圖桑阿稟稱查得謝濟世長二三子已故現存四子謝夢熊夢曾夢思夢舒訊據謝夢熊供稱伊家內並無齊周華獄中添髻記叙稿止有伊父在時刊刻梅莊雜著一本繳出該司恐有隱匿情事隨率同劉宗瑛於謝夢熊等住屋內檢查書籍有謝濟世自註學庸抄本一件懇請終養摺稿一件其餘係四書五經並廣西通誌近科坊刻時文等件隨同繳出之梅莊雜著一本封送查驗前來並將謝夢熊等弟兄帶至省城候訊臣細查各書籍內並無不法字跡惟繳出之梅莊雜著詩文一本議論乖謬語多怨悵閱之不勝駭異隨率同布政使淑寶按察使圖桑阿驛鹽道周升桓將謝夢熊等逐加研訊據謝夢熊供稱伊父前任京官時伊尙年幼家居及乾隆三年外任湖南道員以後始生夢曾諸弟伊父從前爲齊周華作叙之事無由得知伊父除梅莊雜著外亦無別項未刻詩文伊弟兄三人現俱傭工度日並無房產亦未讀書不曉文理伊父

所刻之梅莊雜著所說何語實不知道等情臣查謝濟世曾爲御史又復屢任道員乃所著詩文多有怨悻狂悖之處刻本存留實爲世道人心之害伊雖身死仍應按律辦理但浙省咨查所贈齊周華添髯記內悖逆之處謝濟世家內現無原本據謝夢熊堅供無由得知而謝濟世第六子謝夢思訊明現在贅居湖南湘潭縣張燦家中除咨明湖南撫臣將謝夢思押解來粵一併確訊另行定擬具奏外理合先將謝濟世刊刻梅莊雜著一本語句狂悖之處粘貼黃簽同伊自註學庸抄本及摺稿另封敬呈御覽臣謹會同兩廣總督臣李侍堯繕摺恭奏伏祈皇上睿鑒謹奏乾隆三十三年正月十八日硃批此人已死何必追究餘有旨諭

密行查辦寄銀生息之事諭 軍機處檔 實錄

齊召南於堂兄齊周華逆案爲之隱諱不奏咎實難辭是以令其來京候旨今據軍機大臣會同刑部訊問擬以杖流朕念其曾爲大員已加恩寬免遞回原籍並傳旨令其閉戶安分倘再不知感恩警惕或掉弄筆頭語含怨誹則齊周

華燭戒具在不能更爲曲宥矣前據熊學鵬查出齊周華控告齊召南原詞有將銀寄與江姓生息之事伊平素以讀書立身爲事豈應自蹈商賈牟利惡習且現已邀恩免其治罪又何得安然無事坐享贏餘著傳諭熊學鵬可即密行查辦惟酌留餬口外所有生息餘貲即盡數查出歸公以充本地公用毋任稍有隱匿倘該撫以同係科目中人或意存徇隱則是自取罪戾矣將此傳諭該撫知之欽此乾隆三十三年二月初四日

寬免齊召南杖流諭 實錄

諭軍機大臣會同刑部議原任侍郎齊召南於堂兄齊周華造作逆詞不能稽察糾參應照律擬流得旨齊召南曾爲侍郎乃於堂兄齊周華逆案爲之隱諱不即參奏實難辭咎念其曾爲大員所有問擬杖流之處著加恩寬免乾隆三十三年二月辛酉

熊學鵬奏密查齊召南生息銀兩摺 繳回硃批檔

浙江巡撫臣熊學鵬跪奏爲奏聞事乾隆三十三年二月十三日承准大學士公傳恆大學士尹繼善大學士劉統勳字寄內開乾隆三十三年二月初四日奉上諭齊召南於堂兄齊周華逆案爲之隱諱不奏咎實難辭云云見本案六頁欽此寄信到臣臣查國家設立科目俾得讀書上進原欲其曉明忠孝大義以爲鄉里表率今齊召南近族內有悖逆之齊周華齊召南身爲大臣隱諱不奏實爲有玷科目荷蒙皇上格外加恩不將齊召南治罪僅令遞回原籍伊所有家賞仍准酌留餬口皇仁實屬浩蕩其生息餘貲自當查出盡數歸公臣何敢稍存徇隱致齊召南於邀恩免罪之外復得坐享饒裕臣查齊召南尙未遞解到浙其將銀兩寄與江姓生息齊周華原控呈內所稱江姓乃揚州鹽商未有的名浙省無從知其底細據稱已取回八百兩尙存三百兩生息等語齊召南住居天台房屋甚大伊旣設心牟利必不止此數百金臣現在一面密咨江蘇撫臣及兩淮鹽政密查鹽商江姓確係何人並生息本利確數一面密委糧道陳夢說湖州府知府布勒亨前往天台密查齊召南家貲確數毋致稍有隱匿其應充公若干並酌留齊召南餬口若干之處俟查明另行具奏理合將接奉

諭旨密行查辦緣由恭摺覆奏伏乞聖鑒謹奏乾隆三十三年二月十九日硃批覽

將梅莊雜記書板銷燬諭 軍機處檔 實錄 東華錄

據宋邦綏奏接准熊學鵬咨稱浙江逆犯齊周華書內有已故謝濟世贈該犯添髻記叙移交查辦當即委員嚴查伊家內並無此件原稿惟有所作梅莊雜著一本中多乖謬怨恨之語現將伊子謝夢熊等研審究擬等語已於摺內批諭矣謝濟世性情乖戾屢獲罪愆今閱雜著所簽各條誠不免語含怨望使其人尙在自當明正其罪以昭懲創但其人已物故多年自可無庸復加審究惟伊所作書詞既多謬妄不應復任存留該撫即飭令地方官將已刷之書及原刊板片盡行查出銷燬毋使稍有疎漏著將此傳諭知之欽此乾隆三十三年二月二十日

熊學鵬奏查出呂撫著書怪妄請追板銷燬摺 繳回硃批檔